



Svjedočeci u svoju korist, optuženi Srpko Pustivuk ispričao je kako je “nepoznata vojska” izvršila napad na selo Gornja Bioča (općina Ilijaš) u maju 1992. godine, kada su, prema optužnici Tužilaštva BiH, ubijena dva a ranjena tri civila.

Pustivuk, koji je u maju 1992. godine radio u Stanici javne bezbjednosti (SJB) Ilijaš, rekao je pred Vijećem Suda BiH da je na dan ubistva dvojice njegovih komšija Bošnjaka dobio poziv da dođe do sela Gornja Bioča, gdje se pojavila “nepoznata vojska”.

“Zabrinut za vlastitu porodicu, najprije sam otišao do oca, koji mi je rekao da su nepoznati vojnici otišli u pravcu zaseoka Kluč, gdje je živjelo nekoliko bošnjačkih porodica”, rekao je Pustivuk, naglasivši kako se potom, zajedno sa svjedocima O3 i O4, uputio prema kućama svojih komšija.

Pustivuk je kazao da je na putu prema selu vidio da gore dvije kuće, dok je treća kuća bila opkoljena.

“Čuli smo pucnjavu i potrčali prema kući. Čim smo ušli, žena je uzviknula: ‘Srpko, spašavaj mi djecu.’ Dvoje djece je bilo ranjeno, od kojih jedno teže. Svjedok O3 i ja smo ih odnijeli do auta, pa u Dom zdravlja”, ispričao je Pustivuk.

Justice Report

<http://www.ilijas.ba>

Prema kazivanju optuženog, nijednog od vojnika koji su bili ispred kuće nije poznavao, ali je za jednog od njih kasnije čuo da se zove “Kapetan Zoran”. “Na odlasku od kuće sam čuo kako ga vojnici pitaju šta da rade sa zarobljenim mladićem, na što je on odgovorio: ‘Ubijte ga’”, ispričao je optuženi.

Tužilaštvo BiH tereti Pustivuka, bivšeg pripadnika SJB-a Ilijaš, da je 29. maja 1992. godine, ili približno tog datuma, s drugim pripadnicima vojske i policije Srpske Republike BiH, učestvovao u napadu na civile u selu Gornja Bioča. Tom prilikom su, stoji u optužnici, ubijena dva, a teško ranjena tri civila, od kojih je dvoje bilo maloljetno.

Pustivuk se tereti i da je tokom maja i juna 1992. godine, kao milicioner-specijalista pri SJB-u Ilijaš, učestvovao i u nezakonitom zatvaranju civila Bošnjaka, koji su potom pritvarani u logore i druge zatočeničke centre. Optuženi se nalazi u pritvoru od jula 2010. godine.

Pustivuk je prilikom svjedočenja u svoju korist ispričao da su Bošnjaci iz sela Gornja Bioča sami tražili "od komšija Srba" da budu sklonjeni na bezbjedno mjesto. Pustivuk tvrdi da njegove komšije nisu bili zatočeni u školi, jer kad je on obilazio školu, "vrata su bila otključana".

Optuženi je kazao kako je ispitivao nekoliko Bošnjaka u školi, istražujući ko je pucao na fasadu njegove kuće par dana prije "njihovog dolaska u školu".

Zaštićeni svjedoci O3 i O4 su na ovom ročištu saslušani bez prisustva javnosti.

Na narednom ročištu, zakazanom za 18. oktobar 2011. godine, Tužilaštvo BiH namjerava unakrsno ispitati optuženog.